

SUHANO PETRUS KABHAO-BHAONO

Kaatono Wamba

Suha aini nobuhie Petrus, seemie rasulu mai'aono ne rasulu ompulu hoduanu. Suha kabhao-bhaono ini, nobuhie so mie marasaeano suano Yahudi we tombu-tombudo umati we kadieno Asia. Umati andoa maitu nokonada “Umati nepilino Lahata'ala” (1:1). Patudhuno so namekata-ngka'ao kaparasaeando umati we na'a, kapa'amo waktuu aitu andoa sadhia dofodee-deeda. Siga'a mie marasaeano do'umbuda, dokonada mie modai (2:12; 3:16). Petrus nofe'ulaiandae putae Bhihita Metaano Yesus Kristus mbalimo kaengkoha'ano posahuna'aondo mie marasaeano ne Kristus. Yesus padamo nomate, tamaka nowanu mai'ao ne mate maka nopodhandi nafosuliki. Kakadee-deeno Kristus nembali dua se'ise sandaha so neangkafi (2:18-25). O kakadee-dee nenamisindo umati ingka mbalimo dua ka'udhino kamatangkano kaparasaeando (4:12-19). Nandoo nobhahi katangahi sigao'ano, ibahano pokai'ano bhe dadi mongkilo bhe dadindo mo'ane bhe hobhine ne polambu se'onu (3:1-7).

Kalengkano suha 1:1-2

1 Suha aini nomai'ao ne Petrus, rasuluno Yesus Kristus, so bhahitie'iku umati nepilino Lahata'ala, meateno te kadieno Pontus, Galatia, Kapadokia, Asia bhe Bitinia. Hintimiu dadiomu kanggetu mie humampe ne dhunia ini. ²Hintimiu dopilikoomu mbali umatino nopoangkafi bhe patudhuno Lahata'ala Amantoomu mpini kabhao-bhaono. Hampano kahadhaano Rohino Lahata'ala, membalimoomu umatino mongkilono, neanomo meangkaomu ne Yesus Kristus bhe dhosamiau nati'amponi mba'inomo tuhuno heano Kristus. Sio-siomo sadhia nama'angkoomu kabarakati bhe kato-hopono dadi pontalabhi-labhino.

Posahuna'ao, kaparasaea bhe kanini kaasi
1:3-12

³Pudhi kaitaomu Lahata'ala Amano Yesus Kristus Ompu-ntoomu, kapa'amo nofowa'aomo dadi bu'ou hampano kabhalano rahamatino. Anoa padamo nofowanu Yesus Kristus mai'ao ne mate, kae'awa'antomoomu dadi bu'ou bhe posahuna'ao motangka so oleo mbuhumai. ⁴Intaodiomu doposahuna'ao sepali'a dae'awa kadawu nefontaa-ntaano Ompu so umatino. Kadawu nehunsa-hunsano te surugaa maitu pae nabinasaa, pae naohakua bhe pae naleleua. ⁵Hampano kaparasaeamiu, Lahata'ala nodhaganikoomu weo kuasano, neanomo me'awaomu kasalamati kumantaa-ntaa'ano so nefeko'ulaino ne pandano dhamani.

⁶Dadi'anomo fowulae'omu lalomiu, mahinggamo ampa aitu nandoo noguguhu lalomiu sebantaha, mba'inomo metompaloi'omu sabhaha kasabha bhe kasoba. ⁷Patudhuno kosasawi'ae ini somo ka'udhino kaparasaeamiu, nokampuu-mpuu bhaha'i miina. Sanginomo bulawa o bara mobinasa do'udhiane efi, bhemo toha kaparasaeamiu ne Lahata'ala, ingka nofoliu'e kakoharagaa bhe bulawa. Mada kaowu da'umudhie natipande'aomo kamatangano, maka kaparasaeamiu natipudhimo ne Lahata'ala, me'awaomu kafosibhala bhe kakalabha ne oleo kahato'ano Yesus Kristus. ⁸Mahinggamo wutono Kristus miina mohae'omu, ingka moasianeomu. Ampa aitu mahingga sadaa-daa miina mohae'omu, ingka sadaa-daa dua parasaea'eomu. Kanandoo'anomo mo'ia'omu mpuu, ka'osano kawulano lalomiu na'a miina natikiha-kihaa. ⁹Kao'ia'amiu hampano patudhuno kaparasaeamiu nosampemo, ma'anano nosalamati-mo alusumi.

¹⁰Ana-anabii dhamani wawono dofoti-fotindaemo kasalamati aini bhe do'ondofi kansuhu ma'anano. Andoa dokosuaha'aanemo wawo kabarakatino Lahata'ala so ne'awamiu. ¹¹Kapa'amo Rohino Kristus meateno weo totono lalondo, nofohatoda wawo putae Kristus naenamisi kakadee-dee bhe mada ana'a naetahima kakalabha. Dadi'anomo do'ondofie mpuu la'ae bhahaa Kristus maitu bhe naefie nakumadhadhia toka nekosuaha'aondo na'a. ¹²Lahata'ala nofohato ana-anabii na'a putae bhihita nekosuaha'aondo, suano so wutondo tamaka so hintimiu. Ingka bhihitamoo dua ana'a nefetangkemiu ampa aini ne mie meowano Bhihita Metaa. Weo kuasano Rohino Lahata'ala nefosampu mai'ao te surugaa, mie

ana'a dofosampeangkoomu Bhihita Metaa ana'a. Mahinggamo mala'ekati, gaondo damande'aane dua bhihita aini.

Dadi mongkilo bhe pomoni-monini'ao

1:13-25

¹³Dadi'anomo naetaa namantaa-ntaa totono lalomiu. Fewanaki wutomiu bhe posahuna'aaneomu mpuu kabarakati so ne'awamiu ne oleo kahato'ano Yesus Kristus namada kaowu. ¹⁴Membaliomu ana'i meangka ne Lahata'ala, koemo dadiomu angkafiomu kapoindalomiu endefi'ini, wakutuuno miina'o mande'ao'omu Lahata'ala. ¹⁵Tamaka tabeano naongkilo totono lalomiu weo sabhaha nehabumiu, tapedamo kangkilono wutono Lahata'ala toka bhasikoomu. ¹⁶Ingka notibuhi weo Kitabi, "Tabeano mongkiloomu, kapa'amo Idi aongkilo."^a

¹⁷Weo sambaheamiu, Lahata'ala konae'omu Amamiu. Ingka Anoamo so fobhotusino tanamangka-angka habundo manusia seemie-seemie, pae napo'ala-alaandaa. Dadi'anomo tinangke nandoo butuomu we dhunia ini, fosibhalae'omu mpuu Lahata'ala. ¹⁸Ingka pande'aanemoomu, o ae katolosino toka netandua'ao so mobebasikoomu mai'ao ne dadi sia-sia kahunsa'aondo awua'imiu. Katolosino ana'a ingka suano bara mobinasa, peda bulawa tawa salaka, ¹⁹tamaka fofoliu'ano ka'ali, tuhuno heano wutono Kristus. Anoa nembalimo peda dhumba nesumbele tapa kodengo bhe tapa kosakino. ²⁰Kristus tokamo nopilie Lahata'ala mpini miina'o bhe dhunia, tamaka kane'o notiumba ne pandano dhamani aini, so kasalamati'amiu. ²¹Noangka ne Kristus hintimiu parasaea'omu ne Lahata'ala, modadino Kristus mai'ao ne mate maka nofekakalabhia'e. Dadi'anomo kaparasaea bhe posahuna'aomiu sena'a-na'na ne Lahata'ala.

²²Hampano meangkaomu kafoina'u banarano, totono lalomiu nomoindamo bhe nohelasimo pomoni-monini'ao'omu. Dadi'anomo pomoa-moasi'ao'omu sampuu-mpuuno lalomiu. ²³Kapa'amo dadi bu'ou ne'awamiu miina namai'ao ne wineno mbadha mobinasano, tamaka nomai'ao ne wutono Kowineno pata mobinasano, hampano kaparasaeamiu ne bhoasaono Lahata'ala dumadino suhue dhamani. ²⁴Kapa'amo [notibuhi weo Kitabi],

"O manusia tapedamo kahoku,

sabhaha kakalabhiano kanggetu kambeano kahoku,

^a 1:16 Im 11:44-45, 19:2, 20:7

o kahoku noleleumo,
kambeano notantamo.

²⁵Tamaka bhoasaono Ompu sadaa-daa ampa suhue
dhamani.”^a

Ingka bhoasaomo aini o Bhihita Metaa toka nefosampe ne
hintimiu.

Kontu dumadino bhe bansano liwu mongkilono
2:1-10

2 Dadi'anomo, ohoe'oomu toha sabhaha modai'ano, koemo ko-
pahaomu, koemo fehaa'ulaomu, koemo nokondua lalomiu
bhe koemo dua fo'umbuomua. ²Naetaa membaliomu toha nada
ana'i kane'o lumenteno, gaono sadhia natumiti. Nadamo ana'a
hintimiu sadhia me'ondofiomu so otino alusumiu, neanomo dhulu
kamatangka kaparasaeamiu maka sumalamatiomu. ³Kapa'amo
notibuhi weo Kitabi peda aini, “Ingka namisiemoomu kataano
Ompu.”^b

⁴Dadi'anomo ma'otiomu Ompu. Anoamo tapedamo kontu du-
madino. Daanumo do'ohoe manusia, tamaka nopilie Lahata'ala
mbali kontu sandi foliuno kakoharagaa. ⁵Hintimiu tapedamo dua
kontu dumadino, dadi'anomo undaomu namakekoomu Lahata'ala
so namoehe'ao lambu so katisombai'ano. Ane nada na'a, ingka
membalimoomu imamu mongkilono mefoampeno kapopanga
posahataano bhe lalono Lahata'ala noangka ne Yesus Kristus.
⁶Kapa'amo notibuhi weo Kitabi peda aini,

“Padamo aepili sepoi kontu koharagaa,
ahunsae te kabhawono Sion somo sandi bhalano.

Sabhaha mie marasaeano ne Anoa paise nandidikiane
lalondo.”^c

⁷Kontu ana'a nokoharagaa sepali'a so hintimiu marasaeano,
tamaka so mie tapa marasaeano nopokantibhamo bhe kabuhino
Kitabi peda aini,

“O kontu ne'ohondo mefelambuno,
ingka nembalimo sandi bhalano.”^d

^a 1:24-25 Yes 40:6-8

^b 2:3 Mzm 34:8

^c 2:6 Yes 28:16

^d 2:7 Mzm 118:22

⁸Notibuhi dua,

“Kontu aini somo katituno'a,
somo dua katifolongko'ando mie.”^a

Katituno'ando hampano miina daeangka ne bhoasaono Lahata'ala, pedamo toka nefotantuno Lahata'ala.

⁹Tamaka hintimiu bansano liwu tipilino, imamu meompuno ne Omputo, bansano liwu mongkilono, umati fehebua'ano wutono Lahata'ala. Lahata'ala nopilikoomu bhe nobhasikoomu mai'ao weo kahohondo pesua'omu weo kantalea kumalabhiano, neanomo molelee'omu sabhaha habuno timent'e'aono.^b ¹⁰Endefi'ini hintimiu suano umatino Lahata'ala, ampa aitu membalimoomu umatino. Endefi'ini miina namasiangkoomu Lahata'ala, ampa aitu nobhelaa-ngkomoomu lalo.^c

Palima-limano Lahata'ala

2:11-17

¹¹Bhahitie'iku timoasi'aono! Ngkoha-ngkohamiu te dhunia ini kanggetu mie humampe bhe mie meateno ne koliwuno. Dadi'ano-mo aesalo mpuu, koise angkafiomu kapoindalono wuto, kapa'amo sadhia nopoewangi bhe kapoindalono alusu. ¹²Ehe mengkohamiu ne olotando mie tapa marasaeano ne Lahata'ala tabeano naetaa sepali'a, neanomo ane dakumonakoomu mie modai, ingka damoha'ao wutondo sabhaha habu metaamiu. Dadi'anomo ne oleo kahato'ano Lahata'ala andoa damekakalabhia'e dua.

¹³Hampano kafosibhalamiu ne Lahata'ala, tuhuomu ne sabhaha mintahano kuasa ne olotano manusia. Tuhuomu ne Omputo Kaisar, mintahanomo pahinta foliuno kalangke. ¹⁴Tuhuomu dua ne gubernur nefoeheno Kaisar so dabhotusi'ao mie modaino diu bhe damosibhala'ao mie metaano diu. ¹⁵Kapa'amo patudhuno Lahata'ala habu metaamiu nadumampu wobhando mie kabhohe-bhohe bhe mohohobuno fekihi. ¹⁶Dadiomu peda mie bebasi, tamaka koise pakeomu kabebasi aitu somo tingkuno habu modaimiu. Dadiomu peda seemie palima-limano Lahata'ala. ¹⁷Fosibhaladaomu kosasawindo mie, moasiandaomu bhahitie'imiu, mote'iomu ne Lahata'ala, fosibhalaomu Omputo Kaisar.

^a 2:8 Yes 8:14-15

^b 2:9 Kej 19:5-6; Yes 43:20-21

^c 2:10 Hos 1:6,9; 2:1,23

Kakadee-deeno Kristus somo sandaha

2:18-25

¹⁸Bhahitie'iku membalino bhatua, tuhuomu ne kafeompu'amiu bhe sadhia fotiwohaandae kafosibhalamiu, koise kaowu ne kafeompu'a metaa bhe momalu'ano lalo, tamaka dua ne mo'osa'ano lalo. ¹⁹Ane ne olotamiu nandoo nefodee-dee tamaka miina dakoka'alaa, naetaa tadasumabahamo datumongku kakadee-dee ana'a, hampano dofe'ulai Lahata'ala. Ane humabuomu peda na'a, ingka feka'iamoomu lalono Lahata'ala. ²⁰O ae bhahaa kapudhiano ane potaami'ao kakadee-dee mba'inomo koka'ala? Tamaka ane humabu metaa'omu maka potaami'ao kakadee-deemiu, ingka feka'iamoomu lalono Lahata'ala. ²¹Dokosabaha weo kakadee-dee, ingka ana'amo katibhasi'amiu ne Lahata'ala, kapa'amo wutono Kristus padamo dua nokadee-dee so hintimiu. Pedamo ana'a ingka nehunsaangkoomu sandaha so neangkafimiu, tumapiomu koina'ano. ²²Anoa miina sepali'a nakodhosaa, miina dua nako-pahaa. ²³Ane dofe'awutie, anoa miina nafofe'awuti. Wakutuuno dofodee-dee'e, miina nafonanti'ao, tangkanomo bhahi-bhahi'ae nofosipulie ne Lahata'ala, Fobhitahakino umadhilino. ²⁴Mbadhano wutono Kristus notongkue bhahi-bhahi'ae dhosantoomu, sampe dokantai'e te sau salipu. Patudhuno neanomo intaodiomu dabebasiomu mai'ao ne kuasano dhosa bhe dadintoomu naposahataa bhe kapoindalono Lahata'ala. Ingka kakowembe-wembenomo mbadhano Kristus meka'uhikoomu. ²⁵Kapa'amo endefi'ini hintimiu pedamo dhumba kolilinono, tamaka ampa aitu sulimoomu ne Mie dhumaganikoomu, umondofaono alusumiu.^a

Dadindo polambu se'onu

3:1-7

3 Pedamo dua hintimiu hobhine'i, tuhuomu ne mo'anemiu, neanomo ane nandoo ne olotando mo'ane'i maitu tapa marasaeano ne bhoasaono Lahata'ala, podiu metaamiu somo damarasaea'ao, mahinggamo pae metula-tulaomu. ²Kapa'amo tetewei damohae kamoindano bhe kalebena dadimiu. ³Ane gaomiu membaliomu hobhine mokesa, koise ta'ondafao kaowu kaokesa'ano fewutoimiu, ibahano legasi'ano wuluno fotu, pake'a lega bulawa bhe pakea mo'ali. ⁴Tamaka kakesamiu tabeano namai'ao weo

^a 2:22-25 Yes 53:4-6,9

totono lalo, o kamalu bhe katohopono lalo. Aini saneamo lega pata mopoopulino, saneamo foliuno ka'ali ne pomatano Lahata'ala. ⁵Ingka pedamo na'a hobhine'i lumebeno endefi'ini posahuna'aono ne Lahata'ala. Kaokesa'ando hampano dotuhu mpuu ne mo'ane-ndo mbalimo legando. ⁶Nopototo bhe Sara neangka ne Abraham bhe noabhiemo dua kafeompu'ano.^a Hintimiu itu ana'ino Sara, sumanomo habu metaa'omu bhe koise konimote'iomu.

⁷Hintimiu dua mo'ane'i, fosibhalae'omu namisino hobhinemiu weo dadino polambu. Tandai'eomu andoa maitu miina napototo ka'osando bhe hintimiu. Fosibhaladaomu, kapa'amo andoa dapooa-owa bhe hintimiu saneamo so umawano kadawuno Lahata'ala, ma'anano dadi suhue dhamani. Dhalangie'omu bhahibhahi'ae ini, keana notitee sambaheamiu.

Kanini kaasi bhe pometaa

3:8-12

⁸Panda-pandano, soba dadi sekakolaloomu, poanta-antangi'ao namisimiu, pomoa-moasi'ao'omu peda mie sebhahi-bhahitieno, pomobhe-mobhela'ao'omu lalo bhe fekapanda diumiu. ⁹Kadai koise bhoosianeomu kadai, fe'awu koise tobhoosianeomu fe'awu, tamaka mesaloomu kabarakatino Lahata'ala so mie aitu. Kapa'amo dadimo medano aitu katibhasi'amiu, somo me'awa'ao'omu kabarakati. ¹⁰Weo Kitabi notibuhi peda aini,

“Ane o mie noasi'ao dadi metaa
bhe nopoindalo kataano namisi,
tabeano nadhumagani lelano ne pugau modai
bhe wiwino ne wamba kopaha.

¹¹Habu modai tabeano na'umohoe
maka nahumabu metaa'ano;
nae'ondofi pometaa,

na'umulei'e lalono ampa na'umawae.

¹²Kapa'amo matano Ompu noangkafi kansuhu mie
banara,
tingalano sandengi ne mie mekatondalano,
tamaka nopoewangi bhe mie humabu modaino.”^b

^a 3:6 Kej 18:12

^b 3:10-12 Mzm 34:12-16

Dosabaha weo kakadee-dee

3:13-22

¹³La'ae bhahaa so kopatudhu modaino ne hintimiu ane moko-kosoomu humabu metaa'omu? ¹⁴Tamaka mahinggamo kumadee-dee'omu hampano angkafiomu kapoindalono Lahata'ala, ingka kodawua'omu. Dadi'anomo koise mote'iomu ne la'ae maka dua, koise tikendaomua. ¹⁵Fosibhalaomou Kristus weo totono lalomiu, ampamo Anoa so Ompu weo dadimiu. Sadhia mantaa-ntaa'omu tumobhoosiomu mie meena'aono kaposahuna'ao nefintahakimiu itu. Tamaka tobhoosiandaomu kamaluno lalo bhe adhatidaomu. ¹⁶Ampamo kaowu totono lalomiu kumatanga-tangano, tabeano namoinda. Patudhuno ane o mie da'umumbukoomu mba'inomo dadi metaamiu peda mie mangkafino Kristus, tadaoambano'aomo wutondo. ¹⁷Ane kapoindalonomo Lahata'ala dakumadee-dee, ingka netaa dokadee-dee hampano dohabu metaa, bhe dokadee-dee hampano dohabu modai.

¹⁸Kapa'amo wutono Kristus nomate'ao dhosantoomu, sepaku kaowu so suhue dhamani. Anoa mie banara nomate'ao mie modai. Kamate'ano ingka so natumonda'ao hintimiu ne Lahata'ala. Mbadha kamanusiano dopongkoe, tamaka Rohino Lahata'ala nofowanue mai'ao ne mate. ¹⁹Weo kuasano Rohi ana'a Kristus nokala nefolele bhihita ne sabhaha rohi netohongku. ²⁰Rohi andoa maitu saneamo pata meangkano ne Lahata'ala ne dhamanino Nuh endefi'ini. Wakutuu ana'a Lahata'ala nokosabaha noantagi manusia dabhalii diundo, tangasano Nuh nofotoka bhangka bhalano nehabuno. Ne na'a seendai kaowu sumalamatino mai'ao ne luano oe bhalano, kabhahindo dooalu.^a ²¹Kadhadhia aitu nembalimo ka'ibahatino kakadiu sarani, mosalamatikomoomu ampa aitu. Kakadiu sarani miina nakopatudhu namekanggela'i sabhaha mohaku'ano ne mbadha, tamaka patudhuno desalo kangkilono totono lalo kumatanga-tangano ne Lahata'ala. Kanandoo'ano bhahi-bhahi'ae maitu mba'inomo Yesus Kristus nowanumo mai'ao ne mate. ²²Ampa aitu Kristus nofonimo te surugaa, nengkoha ne suanano Lahata'ala. Kosasawindo mala'ekati bhe sabhaha mintahano kuasa bhe ka-feompu'a dotuhumo ne Anoa.

^a 3:20 Kej psl 6-7

Dadi bu'ou

4:1-6

4 Mbadha kamanusiano Kristus nenamisi kakadee-dee, dadi'ano mo hintimiu dua tetewei fekamatangka fekihimi so nohelasi'ao kumadee-dee'omu. Kapa'amo mie madano menamisino kakadee-deeno mbadha, nokukundomo dhosa. ²Dadi'anomo katumpono dadimiu we dhunia ini pakee'omu angkafiomu kapoindalono Lahata'ala, koise angkafiomu kapoindalono manusia. ³Ingka endefi'ini nompona sepali'a angkafiomu kapoindalono manusia tapa mande'aono Lahata'ala. Hintimiu angkafiomu sabhaha nafusuu, kapoindalo modai, foho'u ampa mololanuomu, sakahame, mempoho'uomu, bhe mesombai'omu barahala timohakuno. ⁴Ampa aitu mie tapa mande'aono Lahata'ala tadomente mba'inomo miinamo posabhangkaandaomu weo podiu tampahasa pontalabhi-labhino maitu, kati'umbu'amiumo. ⁵Tamaka namada kaowu andoa tetewei dapobhalo'ao podiundo bhe Lahata'ala, kapa'amo Lahata'ala nokantaa-ntaamo nabhotusi mie dumadino bhe mateno. ⁶Kanandoo'anomo Bhihita Metaa dofolelee dua ne mie mateno. Patudhuno, mbadhando daanumo netompaloimo mate, peda kabhotusino Lahata'ala so manusia, tamaka rohindo dadumadi naposahataa bhe kapoindalono Lahata'ala.

Dadindo mie marasaeano ne Kristus

4:7-11

⁷Kafetompaino bhahi-bhahi'ae noma'omo. Dadi'anomo fewana-
kie wutomi bhe kodhagaomu, netaa'ao sambahea'omu. ⁸Tamaka
fofoliu'ano, pomoa-moasi'ao sampuu-mpuuno lalomi, kapa'amo
ane dopomoa-moasi'ao dohelasimo dua dopoma'a-ma'afu'ao, ma-
hingga nobhahi ka'alando. ⁹Pofoti-fotiampeomu ne lambumi,
koise fedee'omu ane bhe mengkahatono we lambumi. ¹⁰Laha-
ta'ala nowa'angkoomu seemie-seemie kapooli po'ala-ala'ano.
Dadi'anomo pake metaa'eomu so po'ondo-ondofao'omu. Ingka
hintimiu mie nefoparasaeano Lahata'ala tumahimano sabhaha
katuno kadawuno. ¹¹Ane seemie neowa kafoina'u, naetaa na-
pugau kanggetumo wambano wutono Lahata'ala. Ane seemie no-
fo'ondofao, naetaa namake ka'osa newa'aono Lahata'ala, neanomo
ne sabhaha nehabumi Lahata'ala damekakalabhia'e namangka ne

Yesus Kristus. Ingka Anoamo kokalabhiano bhe kokuasano ampa suhue dhamani. Amin.

Kakadee-deendo mie marasaeano ne Kristus

4:12-19

¹²Bhahitie'iku timoasi'aono! Koemo menteomua ane mena-misiomu kakadee-dee bhalano. Kakadee-dee aitu tapedamo hendeno efi nepakeno Lahata'ala no'udhi kamatangkano kaparasaeamiu. Ampamo kaowu koe kofekihiomu kadhadhia neto-mpaloimiu na'a nopontalabhi-labhimo. ¹³Tamaka fowulae lalomiu, hampano mealaomu dawu weo kakadee-deeno Kristus, neanomo nahumato tempono kakalabhiano Kristus damotiwohae, sedhulu'a ka'ia bhe kawulano lalomiu. ¹⁴Ane dowambakikoomu mba'inomo angkafiomu Kristus, kodawua'omu. Ingka noko-ma'ana'ao Rohino Lahata'ala kumalabhiano neate weo totono lalomiu. ¹⁵Koise bhe naseemie ne olotamiu itu so kumadee-deeno mba'inomo nofopongko, tawa nosibu, tawa mie modai, tawa mie mesampuruno urusuno mie bhaindo. ¹⁶Tamaka ane kumadee-dee'omu mba'inomo angkafiomu Kristus, koise moambanoa-neomu, tamefoampemoomu katumpuno lalomiu ne Lahata'ala hampano dokonakoomu mangkafino Kristus. ¹⁷Aitu nohatomo tempono Lahata'ala nabhitahakimo dhunia, natumanda ne umatino. Dadi'anomo ane kabhitahakino natumanda ne intaodiomu marasaeano, nada amai bhahaa losano mie tapa marasaeano ne Bhihita Metaa? ¹⁸ {Weo Kitabi notibuhi peda aini,}

“Ane mie banara no'alimo dasumalamatati,
o ae bhahaa so kumadhadhia'ano ne mie pata
meangkano bhe mie kodhosa?”^a

¹⁹Dadi'anomo ane nandoo kumadee-deeno noposahataa bhe ka-poindalono Lahata'ala, naetaa damotawakala dadindo ne Lahata'ala bhe sadhia dahumabu metaa. Kapa'amo Anoamo Fofokonandoono, nokampuu-mpuu ne dhandino.

Dhaganidaomu kawaino dhumbano Lahata'ala

5:1-11

5 Nandoo kamesaloku ne kamungkula'i neangkando umati. Kaebuhi'aku peda aini, ingka idi ini seemie dua kamungkula'indo umati peda hintimiu, pakade awoha'ao wuntano

^a 4:18 Ams 11:31

mataku kakadee-deeno Kristus. Nahumato tempono natiwoha kakalabhiano Kristus, ingka ae'awa dua dawu weo kakalabhiano na'a. ²Aesalo mpuu ne hintimiu kamungkula'i, ondofaandaomu umatino Lahata'ala nefoparasaeano ne hintimiu itu. Kapa'amo andoa maitu kanggetumo kawaino dhumba, hintimiu o dhagano. Koise nokobuku lalomiu tamaka nahumelasi lalomiu dhumananidaomu, nopoulosahataa bhe kapoindalono Lahata'ala. Koise dua ondofaandaomu so kolaba'ao'omu, tamaka kotu-kotu'u patudhumi meompuni'idaomu. ³Koise habu wutomiu peda seemie kafeompu'a, tamaka membaliomu so sandahando umati. ⁴Nahumato kaowu Dhaga Bhalano, hintimiu me'awaomu kawa'ao kumalabhiano nefontaa-ntaa so mie fotalono.^a Kawa'ao na'a pae bhe kasalia.

⁵Pedamo dua hintimiu kahangku dadi, tuhuomu ne kamungkula'i. Kosasawimiu itu fekapandae diumi seemieno bhe seemieno, kapa'amo notibuhi weo Kitabi peda aini,

“Lahata'ala no'ontomi patudhundo mie melangkeno diu,
tamaka nofotiwohaanda kataano lalono ne mie
mekapandano wutono.”^b

⁶Dadi'anomo fekapanda wutomiu te wiseno Lahata'ala foliuno kuasa, neanomo nahumato tempono namekalangkeoomu.

⁷Fopulie sabhaha kasabhamu ne Lahata'ala, kapa'amo Anoamo umondofaono dadimu.

⁸Fewanaki totono lalomiu bhe kodhagaomu, kapa'amo kaewamiu, Kafeompu'ando seetani, nolili peda o singa ngkangau-ngauno ne'ondofi kantolono. ⁹Ewangie'omu, ewangianeomu kaparasaea motangka. Ingka pande'aaneomu kosasawindo bhahitiemiu marasaeano ne Kristus te dhunia ini, saneamo dua kumadee-deeno peda hintimiu. ¹⁰Tamaka Lahata'ala kamai'ao'ano sabhaha rahamati, Anoamo bhasikoomu so mealaomu dawu weo kakalabhia suhue dhamani bhe Kristus. Dadi'anomo namada kumadee-dee'omu sebantaha, Lahata'ala namosangkamo dadimiu, namoeheoomu, nameka'osakoomu bhe namekamatangka kofindamiu. ¹¹Anoamo kokuasano suhue dhamani! Amin.

^a 5:4 Sakotu'uno: *songkono kolaki kumalabhiano pata leleuno.*

^b 5:5 Ams 3:34

Kasongkono suha
5:12-14

¹²Abuhiangkoomu suha aini notulumi kanau Silwanus,^a anoa ini akonae dua seemie bhahitientoomu kumampuu-mpuuno weo kaparasaea. Suha aini miina naewantaa, patudhuku amekamatangka kaparasaeamiu bhe aefe'ulaiangkoomu putae nebhuku ini kotu-kotu'u nefosampe rahamati mai'ao ne Lahata'ala. Fintahakie'omu sepali'a!

¹³Umati bhaimiu nepilino dua Lahata'ala te kotano Babilon bhe anaku Markus, dopakatuangkoomu dua salam. ¹⁴Pofea-feabhao-mu bhe pomoni-monini'ao'omu peda bhahitie pomoa-moasi'aono.^b

Sio-siomo hintimiu se'iseno bhe Kristus sadhia napobhaiangkoomu katothopono dadi. Amin.

^a 5:12 Silwanus neanomo dua Silas; Tul 15:40

^b 5:14 Ondo Rom 16:16